

**BOSNA I HERCEGOVINA
FEDERACIJA BOSNA I HERCEGOVINA
ZENIČKO-DOBOJSKI KANTON
GRAD ZENICA**

NACRT

OBRADIVAČ:

Služba za ekologiju, komunalne i inspeksijske poslove

**ODLUKA
O MJESNIM VODOVODIMA NA PODRUČJU
GRADA ZENICA**

Zenica, april 2018. godine

Na osnovu člana 8. Zakona o principima lokalne samouprave u FBiH ("Službene novine Federacije BiH" broj:49/06 i 51/09), člana 12. Zakona o vodama Zeničko - dobojskog kantona ("Službene novine Zeničko-dobojskog kantona", broj: 17/07) i člana 21. Statuta Grada Zenica ("Službene novine Grada Zenica", broj: 05/15), Gradsko vijeće na sjednici održanoj ____ . ____ . 2018. godine, **d o n o s i :**

O D L U K U

o mjesnim vodovodima na području grada Zenica

I - OPĆE ODREDBE

Član 1.

Ovom odlukom propisuje se način izgradnje mjesnih vodovoda, javnih bunara i javnih česmi, njihovo upravljanje i korištenje, zaštita i održavanje na području grada Zenica.

Član 2.

Vodni objekti koji služe za snabdijevanje vodom za piće naselja izvan općinskih sjedišta su mjesni vodovodi, javne česme i javni bunari.

Član 3.

- (1) Mjesnim vodovodom u smislu ove odluke smatra se vodni objekat koji služi za snabdijevanje vodom za piće jednog ili više seoskih naselja izvan gradskog sjedišta, koji ima zaštićeno izvorište, kaptazu, rezervoar, razvodnu mrežu i ostale objekte.
- (2) Javnim bunarom u smislu ove odluke smatra se vodni objekat sa odgovarajućom zaštitnom zonom i odgovarajućim uređajima koji služi za snabdijevanje vodom za piće najmanje dva domaćinstva u seoskom naselju.
- (3) Javnom česmom u smislu ove odluke smatra se vodni objekat sa odgovarajućom zaštitnom zonom i odgovarajućim uređajima koji služe za snabdijevanje vodom za piće stanovnika i prolaznika, a može biti izgrađena i van naselja.
- (4) Infrastruktura mjesnog vodovoda obuhvata sljedeće vodne objekte: vodozahvatni objekti, kaptaze, bunari, pumpne stanice, potisni cjevovodi, rezervoari, dovodni cjevovodi, razvodna mreža sa zasunskim oknima. Na priključku za svako domaćinstvo trebaju biti ugrađeni vodomjeri - član 4. stav (6) ove odluke.

- (5) Unutrašnjim instalacijama- smatraju se sve instalacije od vodomjera do posljednje izlivne jedinice, a u slučajevima gdje nije ugrađen vodomjer – od mjesta priključka na vodovodnu mrežu.
- (6) Korisnik vode (u daljem tekstu: Korisnik) -je svaka fizička ili pravna osoba koja je vlasnik nekretnine i koja je s Upravnim odborom sklopila Ugovor o održavanju,iskorištavanju mjesnog vodovoda i regulisanju svih drugih pitanja od značaja za mjesni vodovod(u daljem tekstu: Ugovor).
- (7) Korisnikom se smatra i svaka fizička ili pravna osoba koja je s Upravnim odborom sklopila Ugovor o isporuci vode, i svaka fizička ili pravna osoba koja koristi nekretninu priključenu na mjesni vodovod, bilo da svoje pravo korištenja nekretnine temelji na valjanoj pravnoj osnovi (najmoprimac, podnajmoprimac, stanar, zakupac, podzakupac, koncesionar i sl.), bilo da se bez valjane pravne osnove koristi nekretninom. Korisnik je, u kontekstu Zakona o zaštiti potrošača, izjednačen s potrošačem.
- (8) Građevinski odbor za izgradnju vodovoda-je skup ljudi od najmanje tri člana, korisnika vodovoda koje bira Zbor korisnika, a čiju verifikaciju vrši Komisija koju imenuje Gradonačelnik Grada Zenica, i koju čine:
- predstavnik sektora za poslove Mjesnih zajednica i predstavnik nadležne Službe za poslove vodoprivrede.
- (9) Upravni odbor za održavanje vodovoda-je izvršni organ Zbora korisnika, koji se stara o sprovođenju pitanja od zajedničkog interesa svih korisnika, a čiju verifikaciju vrši Komisija iz stava (8) ovog člana.

Član 4.

- (1) Izvorišta voda koja se zahvataju radi snabdijevanja vodom za piće stanovništva putem mjesnih vodovoda moraju imati dovoljne količine zdravstveno ispravne vode za piće, kako bi se u svako doba godine moglo obezbijediti neprekidno snabdijevanje vodom stanovništva.
- (2) Kapacitet rezervoara mjesnog vodovoda treba da obezbijedi dovoljnu količinu vode za dnevnu potrošnju korisnika i rezervu za gašenje požara.
- (3) Izuzetno nadležni organ će investitoru izdati potrebne vodne saglasnosti i kad izvorišta nemaju dovoljne količine vode, ukoliko on na drugi način ne može riješiti snabdijevanje vodom.
- (4) Ukoliko je dovoljan kapacitet izvorišta, a profil cijevi ne dozvoljava mogućnost novih priključaka, finansiranje izmjena postojećeg profila cijevi vrši se po odluci Zbora korisnika iz prikupljenih sredstava održavanja.
- (5) Kaptaža i rezervoari koji su, u smislu ovog zakona, sastavni dio mjesnog vodovoda, a koji služe za prihvatanje i akumuliranje vode za piće, moraju imati propisane izolacije i ostale potrebne uređaje.

(6) Mjesni vodovod mora imati ugrađen i propisno baždaren uređaj za mjerenje količine iskorištene vode na odvodu iz rezervoara, a ako ima više odvoda iz rezervoara, na svakom odvodu.

II – IZGRADNJA MJESNIH VODOVODA I JAVNIH ČESMI

Član 5.

(1) Investitor za izgradnju mjesnog vodovoda može biti Grad Zenica, mjesna zajednica, grupa građana ili građanin.

(2) Izgradnja mjesnog vodovoda vrši se na osnovu izdate urbanističke saglasnosti odnosno odobrenja za građenje po propisima o prostornom uređenju odnosno građenju, uz prethodno pribavljanje prethodne vodne saglasnosti i vodne saglasnosti.

(3) Investitor izgradnje javne česme može biti mjesna zajednica, grupa građana ili građanin, a odluku o o izgradnji javne česme donosi mjesna zajednica.

(4) Ako je investitor grupa građana ili građanin, izgradnja javne česme se vrši uz saglasnost mjesne zajednice, koja je dužna da obezbijedi njeno održavanje.

Član 6.

(1) Izgradnja i rekonstrukcija mjesnog vodovoda vrši se na način i pod uslovima određenim u izdatoj vodnoj saglasnosti.

(2) Ukoliko je investitor grupa građana, isti su dužni putem organa mjesne zajednice izabrati Građevinski odbor od najmanje tri člana, čiju verifikaciju vrši Komisija iz člana 3. stav (8) ove odluke.

Član 7.

(1) Dužnosti i prava Građevinskog odbora su:

- a) pribavljanje svih zakonom propisanih akata potrebnih za izgradnju i rekonstrukciju,
- b) otvaranje podračunamjesne zajednice za ovu namjenu ili štedne knjižice Odbora,
- c) organizovanje potpisivanja Ugovora iz člana 3. stav (6) koji u ime domaćinstva-korisnika potpisuje nosilac domaćinstva,
- d) vođenje evidencije o učešću u izgradnji svakog pojedinca, prikupljenim ili utrošenim novčanim sredstvima i drugim podacima bitnim za izgradnju i kasnije korištenje objekta,
- e) da donese odluku o cijeni priključka na novi vodovod na osnovu raspoložive dokumentacije o ulaganjima korisnika vodovoda u izgradnju mjesnog vodovoda,
- f) da nakon završetka radova podnese pismeni izvještaj Savjetu mjesne zajednice i Zboru korisnika koji ga je izabrao, a svu raspoloživu dokumentaciju preda Upravnom odboru,
- g) da odrede cijenu vode isporučene iz mjesnog vodovoda.

III- UPRAVLJANJE, KORIŠTENJE, ODRŽAVANJE MJESNIH VODOVODA I JAVNIH ČESMI

Član 8.

- (1) Po izvršenoj izgradnji ili rekonstrukciji mjesnog vodovoda, a prije izdavanja odobrenja za upotrebu po propisima o prostornom uređenju, odnosno građenju, pribavlja se vodna dozvola.
- (2) Uz zahtjev za izdavanje vodne dozvole za mjesni vodovod, za koji su investitori grupa građana, podnosi se i pismeni ugovor iz člana 3. stav (6) ove odluke, koji potpisuju svi investitori tog objekta, a koji se ovjerava na sudu, gradskoj upravi ili kod notara i čiji se primjerak dostavlja nadležnoj službi.
- (3) U slučaju da do donošenja ove odluke ne postoji Odbor za vodovod, predsjednik Savjeta mjesne zajednice je dužan da u roku od 30 dana isti uspostavi.
- (4) Ukoliko korisnik vodovoda ne želi potpisati pismeni ugovor iz člana 3. stav (6) ove odluke, smatra se da je odustao od prava na vodovod, te se takvom korisniku voda može isključiti.

Član 9.

- (1) Vodnom saglasnošću odobrit će se priključak na mjesni vodovod s obzirom na količinu vode za piće, ako može da zadovolji potrebe interesanata i ako se njihovo snabdijevanje vodom za piće ne može izvršiti na drugi (ekonomičan i racionalan) način.
- (2) Vodna saglasnost izdaje se pod uslovima nadležne gradske Službe za poslove vodoprivrede i mišljenja mjesne zajednice.
- (3) Licima koja nisu učestvovala u izgradnji mjesnog vodovoda, može se odobriti priključak na mjesni vodovod.
- (4) Lice kome je vodnom saglasnošću odobreno priključenje na mjesni vodovod, dužno je prije priključenja, odnosno korištenja vode, putem ugovora sa vlasnicima mjesnog vodovoda, regulisati plaćanje srazmjernog dijela troškova izgradnje mjesnog vodovoda i srazmjernog dijela troškova održavanja i iskorištavanja mjesnog vodovoda.
- (5) Srazmjerni dio troškova se utvrđuje na osnovu relevantne dokumentacije za predmetni vodovod i određuje uz saglasnost nadležne Službe za poslove vodoprivrede.
- (6) Ako se rekonstrukcija vodovoda vrši u cilju povećanja količine vode radi priključenja novih korisnika, troškove rekonstrukcije snose svi korisnici vodovoda, a novi korisnici snose dio troškova izgradnje i rekonstrukcije vodovoda.
- (7) Cijena priključka ne smije biti veća od cijene priključka na gradski vodovod.

(8) U izuzetnim slučajevima uz dostavljanje dokaza o visini troškova, cijena se može utvrditi u većem iznosu samo uz saglasnost nadležne Službe za poslove vodoprivrede.

Član 10.

(1) Građani koji upravljaju mjesnim vodovodom dužni su da trajno obezbjeđuju potrebna finansijska sredstva i druge uslove za održavanje i funkcionisanje tih objekata u skladu sa njihovom prirodom i namjenom i za vršenje minimalnog broja propisanih pregleda zdravstvene ispravnosti vode za piće iz tih objekata.

(2) Cijena vode isporučene iz mjesnog vodovoda ne može biti određena ispod cijene koja osigurava pokrivanje nužnih troškova iz stava (1) ovog člana i troškova amortizacije.

(3) Sredstva prikupljena za potrošnju i održavanje vodovoda su namjenska i mogu se trošiti isključivo Odlukom Savjeta mjesne zajednice.

(4) Naplatu sredstava za korištenje i održavanje mjesnog vodovoda vrši ovlašteno lice uz izdavanje priznanice ovjerene pečatom mjesne zajednice ili mjesnog vodovoda.

Član 11.

(1) Prikupljena sredstva se uplaćuju na podračun mjesne zajednice do 15-tog tekućeg mjeseca.

(2) Izvještaj o prikupljenim sredstvima sa izvodom iz banke i izvještaj uz dokaz o utrošenim sredstvima ovlašteno lice podnosi korisnicima, mjesnoj zajednici i nadležnoj službi (sektor, odsjek) za poslove Mjesnih zajednica dva puta u toku godine (do 30.06. i 31.12.), a Službi za poslove vodoprivrede jednom godišnje.

Član 12.

Ukoliko korisnik ne izvršava obaveze iz člana 10. ove odluke, Savjet MZ inicira zahtjev za pokretanje prekršajnog postupka putem organa za oblast vodoprivrede.

Član 13.

(1) Mjesni vodovodi mogu se uz saglasnost njihovih korisnika predati na upravljanje komunalnom preduzeću.

(2) Cijenu vode vodovoda koji su predati na upravljanje komunalnom preduzeću, predlaže komunalno preduzeće, a usvaja Gradsko vijeće Grada Zenica.

Član 14.

(1) Vodovodi koji su izgrađeni iz sredstava grada/općine, kantona, Federacije i drugih institucija u dijelu više od 1/2 uloženi sredstava, uključujući troškove za naknadna proširenja i rekonstrukcije mogu se predati na upravljanje komunalnom preduzeću, uz saglasnost nadležne gradske Službe za poslove vodoprivrede.

(2) Uložena vlastita sredstva korisnika, komunalno preduzeće će kompenzirati isporukom vode bez naplate za period koji će pokrivati troškove vlastitih ulaganja građana.

(3) Zahtjev za rekonstrukciju mjesnih vodovoda, mogu podnijeti samo oni vodovodi koji imaju vodnu dozvolu.

Član 15.

(1) Voda se mora koristiti racionalno i ekonomično. Svaki korisnik vode je dužan koristiti se vodom na način i u obimu kojim se voda čuva od rasipanja i štetnih promjena njenih osobina i omogućuje zakonsko pravo korištenja vode drugim licima.

(2) U periodu hidrološkog minimuma (sušni period) za mjesne vodovode koji nemaju dovoljnu količinu vode, korisnici lokalnog vodovoda donose Odluku o uvođenju redukcije vode.

Član 16.

(1) U periodu primjene Odluke o uvođenju redukcije vode zabranjena je upotreba vode iz mjesnog vodovoda i javne česme za sve druge potrebe osim za piće i sanitarne potrebe.

(2) Maksimalna dnevna potrošnja vode u tom periodu po članu domaćinstva je 100 litara.

(3) U periodu ekstremne suše dnevna potrošnja vode po članu domaćinstva može biti i manja, što utvrđuje svojom Odlukom Zbor korisnika vodovoda.

(4) Protiv korisnika koji se ne pridržava Odluke o redukciji vode, po prijedlogu Zbora korisnika, mjesna zajednica vodnom inspektoratu podnosi prijedlog za pokretanje prekršajnog postupka.

IV- ZAŠTITA IZVORIŠTA MJESNIH VODOVODA I JAVNIH ČESMI

Član 17.

Zaštita izvorišta mjesnih vodovoda vrši se uspostavljanjem i održavanjem zona sanitarne zaštite u skladu sa odredbama Zakona o vodama ("Službene novine Zeničko-dobojskog kantona" broj: 17/07) i Pravilnika o načinu određivanja uvjeta za određivanje zona sanitarne

zaštite i zaštitnih mjera za izvorišta vode za javno vodosnabdijevanje stanovništva ("Službene novine Federacije BiH" broj: 88/12).

Član 18.

(1) Do donošenja Odluke za zaštitu izvorišta po odredbama Pravilnika o načinu utvrđivanja uslova za određivanje zona sanitarne zaštite i zaštitnih mjera za izvorišta za javno vodosnabdijevanje ("Službene novine Federacije BiH" broj: 88/12), uspostavlja se privremena zaštita svih izvorišta u radijusu od 50 metara od postojećeg vodozahvata.

(2) Na području I. zaštitne zone izvorišta, zabranjuju se sve aktivnosti koje nisu u direktnoj vezi s normalnim radom i održavanjem vodozahvatnih objekata.

(3) Aktivnosti koje se provode u cilju normalnog rada i održavanja vodozahvatnih objekata ne smiju štetno djelovati na izvorište.

(4) Objekte koji pored vodozahvata imaju izgrađene i rezervoare, potrebno je zaštititi postavljanjem ograde (bodljikava žica) u prečniku od 10 metara s betonskim stubovima minimalne visine 2 metra i sa 12 redova žice.

(5) Prečnik postavljanja ograde se može u izuzetnim slučajevima i smanjiti uz saglasnost nadležne Službe za poslove vodoprivrede.

Član 19.

Zabranjeno je neovlaštenim licima otvaranje i zatvaranje armatura, instalacija, hidranata i ostalih uređaja mjesnih vodovoda, izuzev u slučajevima kada je to nužno u cilju sprečavanja šteta većih razmjera.

Član 20.

Korisnici mjesnih vodovoda su dužni u objekte rezervoara ugraditi hlorinatore, a hlorinacija i održavanje hlorinatora se vrši pod nadzorom preduzeća registrovanog za obavljanje komunalne djelatnosti što korisnici dokazuju Ugovorom o povremenim radovima.

Član 21.

(1) Pregled zdravstvene ispravnosti vode za piće korisnici su dužni vršiti jednom u 3 mjeseca (tromjesečno) u skladu s Pravilnikom kojim je uređena ova oblast, a pregled vrši pravno lice s kojim korisnici zaključuje Ugovor o zdravstvenom pregledu vode za piće.

(2) Kopija nalaza o zdravstvenoj ispravnosti vode za piće dostavlja se nadležnoj gradskoj službi jednom u 3 mjeseca (tromjesečno).

V- NADZOR

Član 22.

Inspeksijski nadzor nad provođenjem ove odluke, u skladu sa članom 129. Zakona o vodama Zeničko-dobojskog kantona, vrši vodni inspektor.

VI- KAZNENE ODREDBE

Član 23.

Novčanom kaznom u iznosu od 200,00 KM do 1.000,00 KM bit će kažnjen za prekršaj Upravni odbor za održavanje vodovoda ili korisnik vode, ako:

- 1) mjesni vodovod ne održava u funkcionalnom stanju i ne koristi u skladu s njegovom prirodom i namjenom,
- 2) ne uspostavi privremenu zaštitnu zonu u roku od 4 mjeseca od dana donošenja ove odluke,
- 3) ne podnese zahtjev za izdavanje vodne dozvole za mjesni vodovod,
- 4) dozvoli priključak na mjesni vodovod bez vodne saglasnosti nadležnog gradskog organa,
- 5) ne zaključi Ugovor o zdravstvenom pregledu vode za piće i Ugovor o hlorinaciji vode i tromjesečne Izvještaje ne dostavlja gradskoj službi,
- 6) ne održava javnu česmu,
- 7) ne podnosi Izvještaj o utrošku sredstava,
- 8) ne postupi po rješenju inspektora.

Član 24.

Novčanom kaznom u iznosu od 100,00 KM do 500,00 KM bit će kažnjen za prekršaj korisnik vode ako:

- 1) sa ostalim vlasnicima mjesnog vodovoda ne zaključi pismeni ugovor iz člana 3. stav (6) ove odluke,
- 2) licu kojem je vodnom dozvolom odobren priključak na mjesni vodovod i korištenje vode s tog vodovoda, ometa priključenje na mjesni vodovod ili mu ometa snabdijevanje vodom iz mjesnog vodovoda,
- 3) ne obezbjeđuje finansijska sredstva i druge uslove za održavanje i funkcioniranje mjesnog vodovoda u skladu s njegovom prirodom i namjenom,
- 4) vrši zabranjene aktivnosti u zaštitnoj zoni mjesnog vodovoda,
- 5) ako se priključi na mjesni vodovod bez vodne saglasnosti nadležnog gradskog organa,
- 6) ako ne ugradi vodomjer,
- 7) vrši zabranjenu radnju iz člana 19. ove odluke,

- 8) ne izvršava i ne podnosi Izvještaj o utrošku sredstava za korištenje i održavanje mjesnog vodovoda,
- 9) vrši prekomjernu potrošnju vode u vrijeme hidrološkog minimuma,
- 10) ako ošteti instalacije i objekat javne česme,
- 11) ne podnese zahtjev za izdavanje vodne dozvole u propisanom roku,
- 12) ne postupi po rješenju inspektora.

VII- PRELAZNE I ZAVRŠNE ODREDBE

Član 25.

Stupanjem na snagu ove odluke prestaje da važi Odluka o vodoopskrbnim objektima na području općine Zenica ("Službene novine općine Zenica" broj: 15/03).

Član 26.

Ova odluka stupa na snagu osmog dana od dana objavljivanja u "Službenim novinama Grada Zenica.

OBRAZLOŽENJE

I – PRAVNI OSNOV

Pravni osnov za donošenje ove odluke sadržan je u odredbi člana 8. Zakona o principima lokalne samouprave u FBiH ("Službene novine Federacije BiH" broj: 49/06 i 51/09), člana 12. Zakona o vodama ("Službene novine Zeničko-dobojskog kantona", broj: 17/07) i člana 21. Statuta Grada Zenica ("Službene novine Grada Zenica", broj: 05/15).

II - RAZLOZI ZA DONOŠENJE

Razlozi za donošenje ove odluke proizilaze iz potrebe da se propisima Grada Zenica urede značajna pitanja u oblasti vodosnabdijevanja kao i način izgradnje mjesnih vodovoda, javnih bunara i javnih česmi, njihovo upravljanje i korištenje, zaštita i održavanje na području Grada Zenica.

Ovo se naročito odnosi na odredbe Zakona o vodama Zeničko-dobojskog kantona, odnosno članove 114. stav 3, 116. stav 2, 134. stav 2, te odredbe Pravilnika o načinu određivanja uvjeta za određivanje zona sanitarne zaštite i zaštitnih mjera za izvorišta vode za javno vodosnabdijevanje stanovništva, odnosno članove 14. i 15., gdje je zbog činjenice stanja na terenu i djelimične provedbe legalizacije mjesnih vodovoda, finansijske situacije stanovništva, došlo do potrebe za izradom Odluke o mjesnim vodovodima na području grada Zenica kojom bi se bliže riješila problematika izgradnje, upravljanja, korištenja, zaštite i održavanja vodovoda. Donošenjem ovakve odluke, kroz razradu i bliže tumačenje zakonskih odredbi i normativa koji regulišu ovu oblast i implementacijom na terenu, regulisanje ove oblasti dobilo bi svoj puni smisao.

III – PRAVNA RJEŠENJA

Članom 1. propisan je obuhvat ove odluke i to: način izgradnje mjesnih vodovoda, javnih bunara i javnih česmi, njihovo upravljanje i korištenje, zaštita i održavanje na području grada Zenica.

Članom 2. propisano je koji se vodovodi imaju smatrati mjesnim vodovodom.

Članom 3. propisana je definicija mjesnog vodovoda, javnog bunara, javne česme, infrastrukture mjesnog vodovoda, unutrašnjih instalacija, korisnika vodnih usluga, Građevinskog odbora i Upravnog odbora.

Član 4. propisuje koja izvorišta mogu biti zahvaćena mjesnim vodovodom i izuzetke (izvorišta koja imaju dovoljno zdravstveno ispravne vode za piće i dovoljne rezerve).

Član 5., 6. i 7. propisuje ko može biti investitor za izgradnju mjesnih vodovoda i javnih česmi, kao i to da se izgradnja objekata vrši na osnovu urbanističko tehničke dokumentacije i vodne saglasnosti, kao i obavezu formiranja građevinskog odbora, prava i dužnosti građevinskih odbora.

Član 8. propisuje prava i obaveze korisnika nakon izgradnje mjesnih vodovoda i javnih česmi.

Član 9. propisuje način i uslove priključka na mjesni vodovod, kao i način utvrđivanja cijene priključka.

Član 10. propisuje obavezu korisnika da obezbijede finansijska sredstva i druge uslove održavanja i funkcionisanja objekata za snabdijevanje vodom za piće, način prikupljanja i cijenu vode.

Član 11. propisuje na koji način i kome se podnosi Izvještaj o prikupljenim i utrošenim sredstvima za korištenje i održavanje mjesnog vodovoda.

Član 12. propisuje način iniciranja i pokretanja prekršajnog postupka ukoliko korisnik ne izvršava obavezu plaćanja za korištenje i održavanje mjesnog vodovoda.

Član 13. propisuje mogućnost predaje mjesnih vodovoda na upravljanje komunalnom preduzeću, način određivanja cijene vode u tim vodovodima.

Član 14. propisuje mogućnost predaje na upravljanje komunalnom preduzeću onih vodovoda koji su izgrađeni iz sredstava viših i nižih nivoa vlasti i drugih institucija u omjeru više od ½ uloženi sredstava.

Član 15. propisuje način korištenja vode i mogućnost za donošenje Odluke o redukciji vode.

Član 16. propisuje maksimalne količine dnevne potrošnje vode u periodu primjene Odluke o uvođenju redukcije vode.

Član 17. propisuje osnov za uspostavu zona zaštite izvorišta mjesnih vodovoda i javnih česmi.

Član 18. propisuje privremenu zonu zaštita svih izvorišta, te koje se aktivnosti zabranjuju na području I. zaštitne zone izvorišta.

Član 19. propisuje zabranu otvaranja i zatvaranja armatura, instalacija, hidranata i ostalih uređaja mjesnih vodovoda.

Član 20. propisuje dužnost korisnika mjesnih vodovoda da u objekte ugrade hlorinatore, a da hlorinaciju i održavanje istog vrše pod nadzorom registrovanog preduzeća, što se dokazuje Ugovorom o povremenim radovima.

Član 21. propisuje obavezu i dužnost korisnika vodovoda da vrše pregled zdravstvene ispravnosti vode- tromjesečno, a pregled vrši pravno lice s kojim korisnici zaključe Ugovor o zdravstvenoj ispravnosti vode.

Član 22. propisuje inspekcijski nadzor nad provođenjem ove odluke.

Članovi 23. i 24. propisuju prekršaje i visinu novčanih kazni srazmjerno počinjenom prekršaju.

Član 25. propisuje prestanak važenja dosadašnje odluke kojom je bila djelimično uređena ova oblast.

Član 26. propisuje vrijeme stupanja na snagu ove odluke.

IV – FINANSIJSKA SREDSTVA

Za provođenje ove odluke nisu potrebna finansijska sredstva iz Budžeta Grada Zenica.

V – DONOŠENJE AKTA

S obzirom da se radi o donošenju nove odluke na nivou Grada shodno Zakonu o vodama Zeničko-dobojskog kantona("Službene novine Zeničko-dobojskog kantona", broj: 17/07"), predlaže se da predmetni akt bude razmatran u fazi nacрта.